

卷之六

戊戌六君子遺集

戊戌六君子遺集

近代中國史料叢刊三編第十八輯
沈雲龍主編

戊戌六君子遺集

張元濟編

文海出版社

有限公司

印行

戊戌六君子遺集

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



丙辰余將謀輯戊戌六君子遺集先後從歸安朱古微祖謀中江王病
山乃徵山陰王書衡式通閩縣李拔可宣龔南海何澄意天柱得譚復
生林嗽谷楊叔僑劉培村四參政楊漪村侍御遺箸獨康幼博茂才詩
若文未之或見僅獲其題潘蘭史獨立圖絕句一首屢求之長素謂家
稿散漫且無暇最錄以從闕爲言然培村之文經病山馳書其弟索久
不獲漪村之詩則止於壬午以前書衡求後集於其嗣子亦不可得也
戊戌距今才二十年政變至烈六君子之遇害至慘且酷其震駭宇宙
動盪幽憤遏抑以萬變忽忽陷坎穽移陵壘谷以禍今日匪直前代之
鈞黨株累邪正消長以構一姓之覆亡已也故輓近國政轉變運會傾
圮六君子者實世之先覺而其成仁就義又天下後世所深哀者獨其
文章若存若亡悠悠者散佚於天壤閒抑不得盡此區區後死者之責

循斯以往將溷於叢殘舊文益不可輯可勝慨哉默念當日余追隨數子輦下几席談論旨歸一揆其起而惴惴謀國蓋恫於中外古今之故有不計一己之利害者而不測之禍果發於旋踵余幸不死放逐江海又二十年始爲諸君子求遺稿而刊之生死離合雖復剝肝瀝紙感喟有不能喻者矣復生遺箸尙有仁學一卷石菊隱廬筆識二卷茲編所錄止於詩文丁巳初夏海鹽張元濟謹識

戊戌六君子遺集總目

寥天一閣文

瀏陽 譚嗣同復生

莽蒼蒼齋詩

同前

遠遺堂集外文

同前

晚翠軒集

侯官 林 旭 瞰谷

說經堂詩草

綿竹 楊 銳 叔嶠

介白堂詩集

富順 劉光第 裴村

雪虛聲堂詩鈔

聞喜 楊深秀 漪春

楊漪春侍御奏稿

同前

康幼博茂才遺稿

南海 康廣仁 幼博

月見子集二

--	--	--	--	--	--	--	--	--	--	--

寥天一閣文目錄

卷弟一凡十有二篇

報貝元徵書

與沈小沂書一

與沈小沂書二

報劉淞芙書一

報劉淞芙書二

上歐陽瓣蘊師書

史例自敘

仲叔四書義自敘

記洪山形勢

劉雲田傳

代大人譔贈奉政大夫任君墓志銘并敘

城南思舊銘并敘

卷弟二凡十有六篇

啓寰府君家傳

崇安侯壯節公家傳

新寧伯蓋臣公家傳

太傅新寧伯莊僖公家傳

新寧伯平蠻公家傳

逸才府君家傳

濬軒府君家傳

熙亭府君家傳

步襄府君家傳

紹泗府君家傳

海嶠府君家傳

忠義家傳

節孝家傳

瀏陽譚氏譜敘例

先妣徐夫人逸事狀

三十自紀

爲卷二爲篇都二十有八

寥天一閣文卷弟一

東海襄冥氏三十以前舊學弟一種

報貝元徵書

元徵仁兄足下無恙霜英遂徂撫序曾喟况乃遠道云胡不思昔奉弟一書會尊舅氏王先生辱過發械共省薄言永歎以謂足下資性卓絕造德隆崇出之淵淵等輩咸伏猶尙戢翼天衢紆步塵鞅兼抱齊衰之戚空谷漣而同方雅故疇不鄉風優喟乎溯曩歲盜簪之盛既皆睽迸王先生復之官山東于茲朝發居今談昔相與不歡而罷以足下遂當西邁振策在涂故不以時報諒之諒之旋奉弟二書猥荷包蒙存問周摯感不可已所布諸書分達如惜爪霖頃上京師還當界之足下改轍河南允云勝算既近尊外舅蔚廬先生之德光又中原山川純厚益以自敦其蘊比當稅息嵩高敷賦梁苑一遨一觀蔑非進道之資矣然則

矻頑之責足下宜爲嗣同肩之乃反見督耶謹齋心以俟今奉弟三書忠告讜言果如私望然又咎已進止不決有類調羹夫事有萬端遇之者一萬無適形一有定理迨遇隨事改理以赴形固非立乎其先者所能鉤取逆觀宦學遐土去留殆難自由稱心而言無嫌參差也嗣同神形疏放靡有羈束恆妄冀不卽棄於大雅時復攻所闕略飢渴情愴匪異朝昔往所酬禽尙未鑿其侈心今聞紛擾之規恢擴宏義開通鄙懷不惜降志自責宛曲引喻擗察艾蕭中臣要害此誠嗣同畢歲營營期自制而不能者獲足下毅色呵止爲之滌衷易情識奮勉之攸在敢不欽登嘉貺不慙以忤特慮意久且懈違謬厥初和緩逝而疾復萌電雷收而震遂泥素絲何常惟所染之故忤者今茲而慙者來日也乃若足下自狀愚以爲降志相誘非其本懷何者足下降質純一夙德堅定似

與嗣同微反而失亦因之嗣同失既在此則足下之失宜在彼矣此對待之說也且嗣同之失往往不自覺而足下自能省察如此此又疏密之辨也訊病推原然與不然與夫大易觀象變動不居四序相宣匪用其故天以新爲運人以新爲生湯以日新爲三省孔以日新爲盛德川上逝者之歎水哉水哉之取惟日新故也未生之天地今日是也已生之天地今日是也亦日新故也喜怒哀樂發不中節不必其乖戾也方其機已勃興於後乃其情猶執滯於前何異鴻鵠翔於萬仞而羅者視乎藪澤則勢常處於不及矣智名勇功儒者弗重不必其卑狹也方其事之終成卽其害之始伏何異日夜相代乎前而藏舟自謂已固則患且發於無方矣此又皆不新故也早歲之盛彊晚歲已成衰弱今日之神奇明日卽化腐臭道限之以無窮學造之以不已庸詎有一義之可

概一德之可得乎常異善豈一而已擇之何云固執俛仰尋思因知固執乎此將以更擇乎彼不能守者固不足以言戰不能進者抑豈能長保不退耶此拳拳服膺之顏子必待欲罷不能而後純惟恐有聞之仲氏且聞何足以臧而後進也聖人重言性天非能之而不言殆亦言之而不能蓋日新者行之而後見泛然言之徒滋陳蹟而已莊生者疏人也然其行文時近日新爲其自言之而旋自駁之也嗣同之紛擾殆坐欲新而卒不能新其故由性急而又不樂小成不樂小成是其所長性急是其所短性急則欲速欲速則躐等欲速躐等則終無所得不得已又顧而之它又無所得則又它顧且失且徙益徙益失此其弊在不循其序所以自紛自擾而無底止也夫不已者日新之本體循序者日新之實用頗思以循序自救而以不已贈足下不已則必不主故常而日

新矣墨墨乎株守豈有一當哉然在足下自治甚嚴自觀甚密覺萬一有近似於紛擾者嗣同至愚極妄以爲乃明之未融非守之不塙若夫讀書忙亂少沈潛翫索之味此病不難醫苟揮斥箸書工文之念霍然立瘳矣嗣同深感不遺在遠之惠又恃往日摯愛之雅妄欲上慕仲顏贈處之風下規蘇李倡和之美遠取聖賢之所黽勉近陳彼己之所憂患竭心盡言忘其自醜將以大叩敢云淺報加久凍新煦品彙向蘇筋力暢固視聽精明興至命筆已不能休故曼衍尔尔世俗箋禽都不復效惟時時思聞德音少解獨學岑寂譚嗣同謹上

與沈小沂書一

小沂仁兄同門足下東都祭軼殷勤須臾口血未乾陵蹠以去夫以道路常常之人牽裾道款曲猶尙睠焉不息况我惠子曷止悵悵執雉始

見志同道合識孟嘉於廣坐標劉尹之雲柯千頃汪洋已可涯涘雖以
嗣同之質朽形穢百靡一當猶樂與從容文酒臧否人倫雕龍白馬互
逞其辭夕秀朝華苟持其辨意有所得狂呼野走於是般桓乎夕照之
寺弭節乎圓松之邱決昔鳥飛天窮於遠莽索羣獸走物感乎暮氣相
謂此亦尋常行復見思不日不月斯會邈然遂已陳蹟可勝歎哉可勝
歎哉道出天津地形平行空明四鑿託體若虛車中倦臥仰見游絲百
尺亭亭茗茗嬋娟裔漾於九天之上謂是偶尔諦視則處處有之惟背
日乃得見今年春暮江南看楊華風日俱素正復類之目力故勝靜且
加明初可十許丈久之辨及百丈內外平視亦二三十丈何時不有游
絲靜便了了尔許曩及足下討論苦乏精采正坐不靜耳夫侃侃之餘
曷嘗不遺物外已攝心一粟然遇於所觸歌哭縱橫獨抽之繭那復成

緒當此之時自覺鞭之不痛殺之無血莫悲於心死而身死次之此既爲哀感中傷心不若人矣又嗣同弱嫻技擊身手尙便長弄弧矢尤樂馳騁往客河西嘗於隆冬朔雪挾一騎兵閒道疾馳凡七晝夜行千六百里巖谷阻深都無人跡載飢載渴斧冰作糜比達髀肉狼藉濡染禪襪此同輩所目駭神戰而嗣同殊不覺今車行未二日計程財百里筋骸骯髒若不自勝年未三十積弛若此異時儻遂有濟耶足下英年績學獨秀無雙時時自省神非完固靈府噎不得開願持之以緩勝之以不戰徐出而求友以自輔同縣有貝元徵者足下見後必當有異此又目不見睫而侈論泰山臣死藥亦不靈者也日來離憂結轡魂依左右口占此書用致綢繆宜發爲談未止此耳嗟嗟懷哉于役天風海山之歌去矣皇都銅鞮秋衾之夢務崇明德請自此辭譚嗣同謹上

與沈小沂書二

小沂仁兄同門足下歲暮得奉富教柄德謙謙盈而沖用之自處善矣而非下走所克承自惟薄劣未遑詩禮恃以無恐多師而已前書云云與足下長賴友朋之言若同質劑非敢以詛人者謗人也嗣是請一切罷去獻歲開春興致頗復佳否緯候解題當已寫定質直見示所獲愈多今復有數事請益遵義黎氏古逸叢書目錄稱高似孫騷略四庫存目徧編不可得煩懣欲絕由不審應入何部足下專精此書望指陳所在近自家大人使蜀頗富閒暇忘其專輒粗欲有事攬拾而官事轉振時復與達官往還哇言尸貌實違鄙心署中度歲薪米要會性尤不近論說之友又終闕如以此居恆邑邑內計心力漸頓便再呶唔一百年亦不過如是爾爾也悲夫熒熒之露既未容把翫殤伯鬼中亦會有窮

者爲比例定爲百斤亦須百斤之吸力乃能舉之粗測球體爲百面面應受吸力一斤以一斤離心力之氣球安於百面之一面擇空漠無人之區竅地絕繩繩之巨細視竅之多寡竅之多寡視離心力之大小繫氣球於地球卽是繫地球於氣球何月行至此度鼓氣球令充足欲絕地上騰而下繫於地必引地之一面而俱上地球與月本來相吸得此一面助之此一面之吸力自重於餘九十九面一有所重卽有所偏偏向月吸力卽專屬於月月將不復旁行而趨於下一上一下翕合無拒餘九十九面之吸力自愈遠而愈懈不惟愈懈地球一離本位九十九面之空氣必爭赴填其虛因其填虛又以得擠送之力力既有定向雖撤去氣球自然相卽不能已大致造端離位最難故氣球宜絕大大或難造分無數小氣球其比例仍同但能掣動分寸一得勢萬萬里無難

矣此就地球往月言之月來地球亦復吸者一面擠者九十九面非此
往則彼來必辨爲孰往孰來或兩俱來而遇於隙地若國君之會境上
華夷之交甌脫尙無由逆億惟月較小較輕來體多耳月去地面八十
萬里有奇以輪船速率日八百里計之千日可達况行於寥廓非有輪
船行水之阻力抑非若火車輪碾軌道之相滯其速當數倍迨愈近吸
力愈重行亦愈速不過數月已聯串如珠惟胖合之頃其來勢遠則相
趨力猛恐一擊兩碎是所設之氣球仍不可撤日有曾益以爲抵禦若
兩舟相切隔以淳伐固無害也旣已聯串性無可改卽終古無睽析之
道由是復與它星相引繫繫固結如布基以平如累卵以長如堆塚以
方以圓以尖以鼈臠以秧馬縱橫如志惟所使之欲自占一國則自取
一星人滿之患以息爭域爭野之患以息華夷各有所驚而陵雜之患

亦息於是與足下朝躡赤霞之標暮度青霓之梁倏星倏月掉臂行遊
是誠可以破拘攣之俗馳域外之觀矣足下其有意乎凡物春夏則漲
秋冬則縮寒暑燥溼使然也大者有草木之榮落江河之涸溢其實小
物亦然木爲鑿柄水之苦不可入金爲牝牡火之堅不可拔時辰鐘表
不能無差機輪剛柔有時也木尺量紙不能無差木紙盈腴殊科也故
績圖之家以紙爲尺然此紙非彼紙仍不能無差惟卽畫其尺於所圖
之紙圖尺同在一紙久久如故其實人身亦然肌寒而粟縮也皮暑而
澤漲也然漲縮分度甚微人遂以爲止此耳所謂微者特兩兩相較而
見爲微是各體漲縮不齊之餘差非卽本體漲縮之真數本體漲縮之
數必一漲縮一不漲縮始可相較而得其真今旣無是物則吾身漲之
與縮安知不相去數十百丈數千萬丈數恆河沙丈小而蟲豸塵芥無

不然大而日星山河無不然無不然則雖相去數十百丈數千萬丈數
恆河沙丈猶不漲縮此謂日用之而不知也必欲知之惟鬼而後可鬼
無適形無可漲縮故世之說鬼有數丈數十丈者有首大如車輪者有
掌如箕者拇如椎者亦有小如嬰兒者財數寸者鬼豈如此哉以漲縮
視不漲縮轉謂不漲縮者漲縮人漲視鬼小人縮視鬼大鬼豈如此哉
於是與足下召巫陽於帝閭問實沈之所郊匿微蹤於幽隱覘情狀之
昭昭以靜擬動以逸知勞非於物而有迫而物或莫逃見夫跛行而喙
息暴長而暴消昔孰屈而卑今何抗而高方將運肘布指絜其度占星
刻晷紀其由舉手厭愉喜則斯陶足下能彊起從之遊乎斯二者持之
非無故申之則有章言似謬悠實根理要又嘗以方波黎餅口安滸葉
用汽機筒抽去空氣旋即自碎圓餅則否蓋方者受外氣之擠力獨多

圓卽自相旋轉無所用其擠也西人識此理因論日月星地所以必爲
圓體愚謂日月星地古未必無方者特皆被擠碎今不見耳是以知十
日並出其九不存必皆爲方體惟今之日月星地悉毀圭角苟圓取容
而已嗟乎凡今之所謂已修已齊已治已平者其不爲苟容幾何矣世
宙信促避之無所一廬蟄伏疑遂積廢稍自激昂故具說如前蓋曰以
詫其振奇適狀此中之無所得也足下憐之否莫笑其駭否譚嗣同謹
上

報劉淞芙書一

淞芙仁兄足下乃者奏記申酬辭渫義陋將以博孫郎帳下之喘何意
辱季重東阿之奮伏見文虎鬚采苞鳳騫華書規河北薄山陰爲嫵媚
章溯當塗異元和之弦急煌煌麗制古今奚閒焉遠惟詩書之所垂戒

瞭史之所紀誦脾情締誼莫不以斯文爲盛軌其稱賡歌揚休尙矣嗣是式微啟聯句之篇宣尼炳會友之詔至若盲左所甄難可悉述故寧戚白水索解於童奴子贛抽琴徵辭於泮婦發言爲志莫近於茲自非終葵論象謬詰於陋儒金樓迫覲見窮於僮父亦疇不樂有多聞之友鴻雁魁碩之侶推袞送抱興往情來析舉比未曙之疑申細席舊傳之學玉琢於石錦泮於灰用胥益其性情而雪其聾瞶之辱者哉嗣同不自鑒觀懷此彌歲遠無獲於尙論近幾失於覲面乃承大度包荒曲見矜許漁父延緣之棹且張皇於漆園協律已厄之詩猶褒贊於笠澤劉晝六合魏收未鄙其名愚衛瓘三都太沖莞顏於覆瓿撫謙沖挹受者曷任被飾薰沐逾量爲惡夫操篋鐘者非期於傾賞而傾賞者遇之書舉燭者無當於治國而治國者效之同類曰孚不行而至言念施報則

亦有可述者嗣同少稟悒悒長益椎魯幸承家訓不卽頑廢然而家更多難弱涕坐零身役四方車輪無角雖受讀於辦疆大圍之門終暴棄於僮蒙無知之日東遊江海中郎之椽竹常攜西極天山景宗之餓鴟不釋飛土遂穴掉鞅從禽目營浩罕所屯志馳伊吾以北穹天泱泱矢音勅勒之川斗酒縱橫抵掌游俠之傳戊己校尉椎牛相迎河西少年擎拳識面於時方爲馳騁不羈之文講霸王經世之略墨釃盾鼻詭辯淵翻米聚秦山奇策紛出狂瞽不思言之騰笑以爲遂足以究天人之奧據上游之勢矣旣而薄上京師請業蔚廬始識永康之淺中弱植俶覩橫渠之深思果力聞衡陽王子精義之學緬鄉賢朱先生闡然之致又有王信余陳曼秋貝元徵諸君以爲友困而求亨幡然改圖愧弄戟多少之譏冀折節勤學之效如何不淑變生海外原隰悼痛踰踉來歸

基礎遂隳何期雲構自頃以來精力荼於當年鋒銳頓於一蹶子桓曾逝者之唏公幹臥幽憂之疾後得復事辦蘊續歡王貝益以涂君質初相勛亟勤他州豪俊存問不絕而臨觴撤御都無好懷發策未竟已復忘棄權靈急節蹉跎至今三十之年行見舍去君苗之硯未焚餘子之步終失親知雨散益復無聊虞思謙愾不其嗟矣足下被褐懷玉質有其文蚤受鑿楹之書高視都講之肆藝文數通雖一斑片羽可由意其深造同里之彥實多君子家公之學遂有傳人夫何張衡之四愁頓釋陳蕃之鄙吝斯固見靈光之賦爲之輟翰景說士之風甘於食肉者也然嗣同至愚尤伏願足下恢八紘以貞度綜羣說以爲郭博取四庫之精約以一家之旨不汲汲於淺效不沾沾於細名同舍生學有異同無傷觀感任彼譏訶之來轉資多識之益竺信不惑終底大成他日汝南

先賢襄陽耆舊與所稱同縣諸君後先駢斬左右齊軌嗣同不敏亦將
憑軾以觀以丐洪河之餘潤而瞻桑梓之殊光豈不懿與豈不懿與劉
君瑾先元徵亟稱之曩歲枉過會親疾在視不獲晤語爲悵然累年天
假之緣終當一識鄉閭之賢者念此用不切切也屬書少作不賦其醜
勉思效命附呈白香亭詩此老本原深厚虎步湘中當代作者殆難相
右知擬先覩之也邇日肄業遂及何書有得不吝見教於斯道宜重有
發明若嗣同則徒云云而已山能受壤終澤隱豹之毛陸不如河虛抱
法蛇之志裁書布往主臣如何諸在口宣不復一一譚嗣同謹上

報劉涖芙書二

涖芙仁兄足下奉來教論陶靖節詩與嗣同所見若重規疊矩今更申
之真西山稱陶公學本經術最爲特識足下所舉區區諸老翁云云他

若道喪向千載人人惜其情汲汲魯中叟彌縫使其醇遙遙沮溺心千載乃相關皆足爲證而嗣同尤有謬解以謂陶公忼慨悲歌之士非無意於世世以冲澹目之失遠矣朱子據箕子荆軻諸篇識其非冲澹人今案其詩不僅此也本不植高原今日復何悔明可以無死之故也若不委窮達素抱深可惜懷寶而無其時也傷己感時衷情如訴真可以泣鬼神裂金石興亡之際蓋難言之使不幸居晉之高位則錚錚以烈鳴矣今其詩又覺中正和平斯其涵養深純經術之效也張南軒譏其委心之言不知皆其不得已而託焉者也且南軒能知其所委爲何心乎後此若王孟韋柳儲蘇特各各成家於陶無涉淺者輒曰原出於陶真皮相之言也嘗謂學詩宜窮經方不爲浮辭所囿聞者或不信之今於陶公既驗其然矣卽有宋儒先以性理爲詩至爲才士嘗詬然平心

論之惟擊壤集中有過於俚率者至於朱子陳白沙於聲調排偶之中仍不乏超然自得之致此詣又何易幾及也同縣蔚廬瓣蘆兩先生實能出風入雅振前賢未墜之緒瓣蘆先生雅自祕惜不欲以此皮膚粗跡表襮於人故傳鈔未廣以愚觀之經義湛深柴桑後未嘗有也蔚廬先生稱心而言絕無依傍雍容真摯適肖其中之所存翠華黃屋屯蒙隱見諸篇非學窮奧域貫徹天人亦烏能言之我輩兀兀雕鐫聲律殆終無以企之矣謹檢以呈閱惟知德者乃能知言當不責其阿好嗣同昔有妄言後世無樂文辭卽樂善察者不惟可得人品之高下兼可卜世運之盛衰瓣蘆先生致爲賞歎持此以觀兩先生詩若遺興三十章海國八章匪風無王下泉無霸諷詠三復不知涕之何從海國猶顯遺興志文俱晦在作者久官京朝詞無泛設然亦斷不肯自言其不得已

之故以意逆志十僅得二三遂已感人若此巢居知風穴居知雨哀思之音發於賢者此殆非天下之小故夫以兩先生之才使不得爲關雎鹿鳴之聲者時爲之也悲夫嗣同於韻語初亦從長吉飛卿入手轉而太白又轉而昌黎又轉而六朝近又欲從事玉谿特苦不能豐腴類皆抗而不能墜闢而不能翕拔起千仞高唱入雲瑕隙尙不易見迨至轉調旋宮陡然入破便縹絃欲絕吹竹欲裂猝迫卞隘不能自舉其聲不得已而強之則血涌筋粗百脈騰沸岌岌無以爲繼此中得失惟自知最審道之最切今時暫輟不爲別求所以養之者必且有異不然匪惟寡德之徵抑亦薄福之象尊師巨湖山樵亦覺微有此失無此失而又靡薄者唐初四傑宋初西崑明初青邱國初漁洋開國隆盛之時順氣成象萬物昭蘇塙有朕兆不可誣也昧者求其故不得乃泥於一句

一字之險夷華樸以爲吉凶媿祥之占其於聲音之道奚當哉由斯以談則擊壤集之俚率要未可全非而陶公益侔乎遠矣譚嗣同謹上

上歐陽澥蘊師書

夫子大人函丈舟維甫鄂轍環逮湘仲路爲之後從榮趨因而失問坐瞬令德怵憚如何前日里門時詣笠耕世兄歆其風氣日上掇皮皆真秉荀氏之規有萬石之謹通家厚誼道款推誠率尔造門輒與李膺之燕外存賓客辱損馬援之貽事會紛紜來去倉卒竟不及一箋言謝媿悚而已頃見函丈與黃佩豹書兼示嗣同藉審道履休咎爲慰讀至既經展拜新塋稍遂昊天瞻仰則此後無論升沈夷險可以少安於心我瞻四方蹙蹙靡騁何辭之悽苦而心之仁厚也夫鋒穎者頓猝滑疑者圖耀赴幾者迅奮委運者後時蹈海者狹節卻金者止贖昌言者亡等

默塞者違實天元地黃五角六張勢趨於極雖造物不能以自綱則志
士仁人之所爲長顧而審慮要必經緯萬端衷於一是特非事變未至
而先設一成格待之之所能黽皇矣然而有不能不自疑者東征之師
既挫衄不復可振矣則天下有大患不在於戰而專中於始事主戰之
人來書云深夜思之芒刺在背可懼懼也在某某豈不知如此舉止之
面猶隔一筵不了家事之意未宣外庭乃逆抉其隱微使無復容匿而
忍慙於一逞亦必深觀密計見夫機之已發情之已急言之如此不言
亦如此是不若明白忼慨直斥無隱天下因曉然於是非之所在庶幾
一意奉戴得以改圖易慮於人心向背之機其濟則天不濟亦何惜一
身爲三監藉口之資蓋其深心矣嗣同一齊民何與人家國事竊恐刈
善而遺善簪尙不若故劍前魚之可念一旦卿何以處我之間瞠目而